

土司文化研究丛书
吉首大学民族学研究文库
吉首大学历史人类学研究丛书

主编◎游俊

土司制度与彭氏土司 历史文献资料辑录 (下)

罗维庆 罗中 编




民族出版社

土司文化研究丛书
吉首大学民族学研究文库
吉首大学历史人类学研究丛书

主编◎游俊

土司制度与彭氏土司 历史文献资料辑录 (下)

罗维庆 罗中 编



民族出版社

图书在版编目(CIP)数据

土司制度与彭氏土司历史文献资料辑录:全2册/罗维庆,罗中编. —北京:民族出版社,2014.1

(土司文化研究丛书/游俊主编)

ISBN 978-7-105-13122-8

I. ①土… II. ①罗… ②罗… III. ①土司制度—研究—永顺县 ②土司制度—史料—汇编—永顺县 IV. ①D691.4

中国版本图书馆CIP数据核字(2014)第028151号

土司制度与彭氏土司历史文献资料辑录(上、下)

策划编辑 向阳

责任编辑 向阳

封面设计 金潇

出版发行 民族出版社

地址 北京市和平里北街14号

邮编 100013

网址 <http://www.e56.com.cn>

印刷 北京市彩云龙印刷有限公司

经销 各地新华书店

版次 2014年3月第1版 2014年3月北京第1次印刷

开本 787毫米×1092毫米 1/16

字数 626千字

印张 37.125

定价 100.00元

ISBN 978-7-105-13122-8/D·2566(汉390)

该书若有印装质量问题,请与本社发行部联系退换

编辑室电话:010-64271909 发行部电话:010-64224782

第二节 溪州之战与彭氏土司基业的确立

一、马楚政权史迹

1. 马殷建立楚国

楚。武穆王于唐乾宁三年丙辰，自立于湖南，至后唐保大九年辛亥国灭，凡五十七年。

武穆王，姓马，名殷，字霸图。唐中和时，孙儒、刘建锋戍蔡州，殷隶军中。及儒败死，众推建锋为帅，殷为先锋。建锋被杀，众推张佖，佖让于殷。时乾宁三年五月也。九月，唐授殷潭州刺史。光化元年三月，命知武安军留后。未几，进本军节度使。梁开平元年四月辛未，封楚王，后唐天成二年六月，封楚国王，许自开国。长兴元年十一月己巳死，年七十九，谥武穆，葬于衡阳之上潢。

（宋·路振撰：《九国志》卷11《楚》，112页，济南，齐鲁书社，1998）

马殷，字霸图，许州鄢陵人也。少为木工。及蔡贼秦宗权作乱，始应募从军。初，随孙儒渡淮，陷广陵。及儒败于宣州；殷随别将刘建峰过江西，连陷洪、鄂、潭、桂等州，建峰尽有湖南之地，遂自为潭帅。顷之，建峰为部下所杀，潭人推行军司马张佖为帅。时殷方统兵攻邵州，佖曰：“吾才不及马殷。”即牒殷付以军府事。殷自邵州旋军，犒劳将士，诛害建峰者数十人，自为留后。久之，朝廷命为湖南节度使，遂有潭、衡七州之地。

唐天复中，杨行密急攻江夏，杜洪求援于荆南，成汭举舟师援之。时澧朗节度使雷彦恭乘汭出师，袭取荆州，载其宝货，焚毁州城而去。彦恭东连行密，断江、岭行商之路，殷与高季兴合势攻彦恭于沔朗，数年，擒之，尽有其地，乃以张佖为朗州节度使，由是兵力雄盛。

殷于梁贞明中为时姑息，所求皆允，累官至守太师、兼中书令，封楚王。又上章请依唐秦王故事，乃加天策上将军之号。又请官位内添制置静江、武平、宁远等军事，皆从之。既封楚王，仍请依唐诸王行台故事，署置天官幕府，有文苑学士之号，知诏令之名，总制二十余州，自署官吏，征赋不供，民间采茶，并抑而买之。又自铸铅铁钱，凡天下商贾所赏宝货入其境者，只以土产铅铁博易之无余，遂致一方富盛，穷极奢侈，贡奉朝廷不过茶数万斤而已。于中原卖

茶之利，岁百万计。唐同光初，首修职贡，复授太师、兼尚书令、楚王。天成初，加守尚书令。长兴二年十一月十日，薨于位，时年七十八。明宗闻之，废朝三日，谥曰武穆。子希声嗣。

初，殷微时，隐隐见神人侍侧，因默记其形像。及贵，因谒衡山庙，睹庙中神人塑像，宛如微时所见者。则知人之贵者，必有阴物护之，岂偶然哉。

（宋·薛居正等：《旧五代史》卷133世袭列传第2，1756~1757页，北京，中华书局，2010）

武穆王世家

武穆王姓马，名殷，字霸图，许州焉陵人也。自云伏波之后。唐中和时，忠武决胜指挥使孙儒与龙骧指挥使刘建锋戍蔡州，拒黄巢，殷隶军中，以勇闻。及秦宗权叛，儒等皆焉，宗权乃遣儒、建锋将兵万人，属其弟宗衡略地淮南，而殷实在行间。

时宗衡方攻杨行密于扬州，未克，会汴兵急攻宗权，宗权召儒等，儒不欲还，宗衡屡趣之，儒怒，杀宗衡，自将其兵取高邮，遂逐行密。行密拒宣州，儒以兵围之，久不下，遣殷与建锋掠食旁县。儒战败死，殷等无所归，乃收余众七千人，推建锋为帅，殷为先锋指挥使，以行军司马张佖为谋主，转攻豫章，略虔、吉，遂有众十余万。

乾宁元年，入湖南，次醴陵。武安节度使邓处讷发邵州兵守龙回关，建锋等至，降其将蒋勋。建锋取勋铠甲被先锋兵，张其旗帜，直趣潭州。至东门，东门守者以为关兵戍还，开门内之，建锋径入府，处讷方宴，擒斩之，自称留后。

明年，僖宗授建锋检校尚书左仆射、武安军节度使，殷为内外马步都指挥使。蒋勋求为邵州刺史，建锋不与，勋率兵攻湘乡，建锋遣殷击勋于邵州。

建锋庸人，不能帅其下，既得志，即嗜酒不事事，常与部曲等狎饮欢呼。军卒陈贍妻有色，建锋私之，贍怒，袖铁挝击杀建锋，断其喉。军中推张佖为帅。佖将入府，马忽蹶啮份伤左髀。是时殷攻邵州未归，佖谢诸将曰：“马公勇而有谋，宽厚乐善，吾所不及，真乃主也。”诸将乃共杀贍，磔其尸，遣姚彦章迎殷邵州。

方值夜，殷犹豫未行，比晓，忽睹一人黑色执大棒趣报曰：“军国内外平安。”俄而不见。殷以为嘉兆，语所亲曰：“此行未必不为福。”因使亲从都副指挥使李琼留攻邵州，径诣潭州。既至，佖肩舆入府，坐受殷拜谒，已，乃命殷升听事，以留后让之，即趣下帅将吏拜贺，盖乾宁三年五月也。秋九月，唐授殷潭

州刺史、判湖南军府事。

光化元年三月，命殷知武安留后，未几，进本军节度使。时湖南管内七州，贼帅杨思远据衡州，唐世旻据永州，蔡结据道州，陈彦谦据郴州，鲁景仁据连州，殷所得惟潭、邵二州而已。五月，姚彦章请取衡、永、道、连、郴五州。殷以李琼、秦彦晖为岭北七州游奕使，张图英、李唐副之，将兵攻衡州，斩师远，引兵趣永州，围之月余，世旻走死，即以李唐为刺史。

二年，遣唐攻道州，蔡结聚群蛮，伏兵于隘以邀之，大破我兵。唐曰：“蛮所恃者山林耳，若战平地，安能败我！”乃命因风燔林，光烛天地，蛮兵惊遁，遂拔道州，斩结。十一月复遣李琼攻郴州，取陈彦谦，诛之。进攻连州，鲁景仁自杀，湖南悉平。

三年冬十月，静江节度使刘士政闻殷尽收岭北，颇内惧，命副使陈可璠率兵戍全义岭。殷遣使聘于士政，使者至境上，可璠不纳；殷怒，令彦晖、琼等将兵七千攻之。兵至全义，士政又遣指挥使王建武屯秦城，以为声援。会可璠掠民耕牛犒军，民怨之，请为我军乡导，言：“西南有小径，仅通单骑，距秦城才五十里耳。”于是彦晖遣琼以六十骑从、步兵三百人，由小径袭秦城，中宵逾垣入，擒建武，束之以练，直造可璠壁示之。可璠未之信，即斩其首投壁中，桂人震恐。琼因勒兵大击，执可璠等及其兵二千余人歼焉。秦城以南二十余壁，望风奔溃，遂围桂管，降士政，尽取其所属桂、宜、岩、柳、象五州。殷以琼为桂州刺史，未几，表授桂管观察使。

天复二年春三月，唐帝使李俨宣谕江、淮，加殷同平章事。

三年夏四月，吴王行密遣使来言梁王全忠跋扈，请绝之。大将许德勋曰：“全忠虽不道，然挟天子以令诸侯，未可轻绝。”

五月，荆南节使成汭赴援鄂州，殷假救杜洪之名，遣德勋将舟师同朗澧兵承虚袭江陵。庚戌，陷之，大掠而归。道经岳州，刺史邓进忠具牛酒犒师，以城归附。殷以德勋为岳州刺史，改进忠为衡州刺史。

天祐元年，淮南遣殷弟赉归长沙，殷表赉为武安军节度副使。二年，我兵侵淮南，为淮南牙内指挥使杨彪所败。三年春三月，淮南将陈知新陷岳州。七月，吉州刺史彭玕来降。明年，梁王全忠改名晃，即皇帝位，改元，殷遣使修贡，具有劝进功。夏四月辛未，梁太祖拜殷侍中，兼中书令，封楚王。

开平元年五月，梁敕改桂州纯化县曰归化。

是月，弘农王渥以鄂岳观察使刘存为西南面都招讨使，岳州刺史陈知新为

岳州团练使，庐州观察使刘威为应援使，别将许立应为监军，统水兵三万人寇。王有惧色，静江军使杨定真贺曰：“我军胜矣。临敌而惧，必胜之道也。”王命在城都指挥使秦彦晖将兵拒上流，水军副指挥使黄璠以舟三百伏浏阳口。

六月，存等遇大雨，引兵还越提，屡战不胜，乃遣我书诈降。王欲许之，彦晖以为不可信，急击之，存等退走，璠以浏阳舟截江合击，大破之，擒存与知新，淮南兵死者无算，获战舰八百艘。威以余众遁去。彦晖遂取岳州。王释存、知新之缚，慰论良久。二人骂曰：“丈夫以死报主，肯事贼乎？”王趣斩之。

是月，王遣兵会吉州刺史彭玕攻洪州，不克。梁武贞节度使雷彦恭会我兵攻江陵，荆南节度使高季昌预屯兵公安，绝彦恭粮道，彦恭败走，我兵亦遁。

秋七月，彦恭袭我岳州，以有备而反。

八月辛亥，梁加王兼武昌军节度使，充本道招讨制置使。

九月丙申，梁削雷彦恭官爵，命王与高季昌讨之，以彦恭焚掠荆湖，又附淮南也。

冬十月，遣秦彦晖与荆南将倪可福攻朗州。彦恭乞降于淮南，淮南命将冷业屯昌江，李饶屯浏阳以援之。王遣岳州刺史许德勋拒其师，未几，执业于鹿角镇，执饶于浏阳寨而归，斩之市中。

是年，淮南将吕师周来奔。

开平二年夏五月，静江节度使、同平章事李琼卒，王以弟永州刺史存知桂州事。乙亥，遣兵攻鄂州，为淮南将秦裴所败。

是月，秦彦晖克朗州，雷彦恭奔广陵，卤其弟彦雄等七人，送于梁。奏改武贞军为永顺军。澧州刺史向瓌来降。瓌与彦恭相表里，至是纳款，我始得澧、朗二州之地。

六月，判官高郁请厅民售茶北客，收其征以贍军，从之。

秋七月，王奏梁于汴、荆、襄、唐、郢、复诸州置回图务，运茶河之南北，以易缿纩、战马，仍岁贡茶二十五万斤，梁主诏曰“可”。由是属内民皆得摘山篔簹，募户置邸阁以居，茗号曰“八床主人”，岁收数十万，国用遂足。

九月，荆南兵屯汉口，绝我朝贡之路。王遣许德勋击之，兵至沙头，荆南求成。又遣步军都指挥使吕师周代岭南，与清海节度使刘隐十余战，取其昭、贺、梧、蒙、龚、富六州。王土地既广，息民礼士，湖南遂安。

开平三年夏六月，危全讽自称镇南节度使，攻洪州。时淮南将刘威守其地，全讽请兵于我，王遣指挥使苑玫会袁州刺史彭彦章（玕之兄也）。围高安以助

全讽。

秋七月，苑玫与淮南将米志诚、吕师造等战于上高，我师败绩。吉州刺史彭玕来奔，王表玕为郴州刺史，且为子希范娶其女。

开平四年夏六月，王表求天策上将。（欧阳史楚世家云：殷乃请依唐太宗故事，开天册府，置官属。今从通鉴。）梁加王天策上将军。王始开天策府，以弟竇为左相，存为右相。（欧史云：殷以廖光图等十八人为学士。又云：希范开府承制，如殷故事，文士廖光图等十八人皆故殷时学士。今依通鉴以十八人之数属希范。）

是月，侵荆南，败于油口。吴水军指挥使敖骈围彭城于赤石，遣兵击骈以救城，已而鹵骈归。

冬十二月，辰州蛮宋邺寇湘乡，溆州蛮潘金盛寇武冈，王命昭州刺史吕师周将衡州兵五千讨之。（先是，宋邺破溆州，潘金盛恃其所居深险，数为边扰，至是俱入寇。）宁远节度使庞巨昭以容州、高州防御使刘昌鲁以高州内附，王命姚彦章、张可求（湘湖近事作可球。）将兵迎之，随以彦章权知容州事，昌鲁为永顺节度副使。

乾化元年春正月，吕师周入飞山洞袭潘金盛，擒送武冈斩之，移兵击宋邺。

冬十二月乙卯，梁以王弟朗州留后竇为永顺军节度使、同平章事。清海节度使刘岩攻梁韶州，陷之，刺史廖爽来奔，王表爽为永州刺史。癸亥，梁敕静江行军司马姚彦章为宁远节度副使，权知容州，从王请也。未几，刘岩发兵寇容州，王命都指挥使许德勋以桂州兵救之；彦章不能守，岩遂取我容州，又取高州。是时开冶铸天策钱，文曰“天策府宝”，铜质浑厚，径寸七分，重三十铢二参。（董道钱谱曰：马殷据湘南八州地，建天策府，因铸“天策府宝”）。

乾化二年春二月，辰州蛮宋邺、溆州蛮吕师益帅众降，王以邺为辰州刺史，师益为溆州刺史。

夏四月癸丑，梁以王为武安武昌静江宁远等军节度使、洪鄂四面行营都统。甲戌，梁主闻我与岭南相攻，命右散骑常侍韦戡等为潭、广和叶使。

六月，梁郢王友珪弑其主晃而自立。

冬十一月，吴将陈璋袭岳州，执我刺史苑玫，王遣水军都指挥使杨定真救之。璋复进攻荆南，吴恐我师往救，遣刘信帅江、抚、袁、吉、信五州兵屯吉州，为璋声援。

乾化三年春正月，吴陈璋兵还，我兵会荆南兵于江口邀之，璋骈艘夜过，

追之不及。

三月，梁均王友贞讨贼，友珪伏诛，友贞立于大梁，更名理。

秋八月，姚彦章侵吴鄂州，吴以池州团练使吕师造为水陆行营应援使，未至而我兵解还。

冬十月，南平王刘岩求婚，许之。

乾化四年夏四月，吴袁州刺史刘崇景举州来附，许贞以师援之，吴将柴再用、米志诚帅师讨之。

是月，岳州都指挥使王环袭吴黄州，执其刺史马邺。

五月，吴柴再用等破刘宗景于万胜冈，崇景遁去，许贞师败归，复失袁州。

贞明元年秋八月，南平王岩来逆妇，王遣弟永顺节度使存送女于广南。

冬十一月，梁改元。是岁梁主改名瑱。（册府元龟作瑒。）

贞明二年冬十二月，通好于晋，晋亦遣使来聘。

贞明三年三月，王遣弟存攻吴上高，俘获而还。

贞明四年秋八月，吴军攻虔州，防御使谭全播来乞师，王命张可求将万人救之。吴刘信遣其将张宣夜帅兵三千袭可求于古亭，我师败绩。

是月，梅山蛮寇邵州，守将樊须击走之。

贞明五年夏五月，王遣兵攻荆南，荆南求救于吴，吴命镇南节度使刘信率洪、吉、抚、信步兵自浏阳寇潭州，武昌节度使李简率水军趣复州。信等至潭州东境，我师释荆南引归。简入复州，执知州鲍唐。

贞明六年冬十二月，吴越王鏐为其子傅璠（一作琇）。来求昏，许之。

龙德元年夏五月丙戌朔，梁改元。

秋七月，命掌书记李岷、马匡送女于吴越。

是岁，辰、溲蛮入寇，姚彦章讨平之。

龙德二年□月，始取永、道、郴诸州民丁钱绢米麦。（李心傅朝野杂记曰：马氏据湖南，始取永、道、郴州、桂阳军、茶陵县民丁钱绢米麦）

龙德三年夏四月己巳，晋王存勖称皇帝于魏州，国号大唐，改元同光。

冬十月朔，日有食之。唐主入大梁，遂灭梁。王遣子牙内马步都指挥使希范入觐，纳洪鄂行营都统印，上本道将吏籍。唐主问洞庭广狭，希范对曰：“车驾南巡，财堪饮马尔。”唐主大悦，既而抚其背曰：“比闻湖南必为高郁所图，有子如此，高郁何能可得邪！”郁故谋臣，唐欲去我爪牙，佯为流言以间之。（三楚新录曰：马希范入觐，途经淮上。时桑维翰旅游楚、泗间，知其来，遽谒之曰：“仆

闻楚之为国，挟天子而令诸侯，其势不可谓之卑也。加以利尽南海，而公室大富。足下之来，非倾府库之半，则不足以供刍粟之费。今仆贫者，敢以万金为请。”希范轻薄公子，睹维翰形短而腰长，语鲁而且丑，不觉为之绝倒。既而赠与数百缣，维翰拂衣而去。及希范立，时维翰已为宰相，奏削去半仗。其事似未可信，录以备考。）

是月，复以桂州之归化县为纯化县。

是岁，避唐庙讳，改岳州昌江县曰平江。

同光二年夏四月乙亥，唐加王兼尚书令。

冬十月，进罗浮柑子于唐，又遣使贺唐主万寿节，进银龙凤陷花漆浴斛一事，盘龙御衣、龙凤蹙金鞞腰、龙凤装箭箛、龙凤朱背弓、红丝弦、金镀头箭冬一副，白金一千铤。

同光三年冬十一月，王闻蜀亡，大惧，表求致仕，略曰：“臣已营衡麓之间，爰为菟裘之地，愿归印绶以保余龄。”唐主玺书慰劳，优诏不许。

是时王关市无征，四方商旅闻风辐凑。湖南地故产铅铁，用都军判官高郁策，铸铅钱，以十当铜钱一；（通鉴云湖南专用锡钱。已又铸铁钱，围六寸，文曰：“乾封泉宝”，用九文为贯，以一当十，“乾封钱”，其文自上而右而下而左，独泉字作篆文。湖南故事曰：马殷置铁冶铸钱，可六寸围，重非铢两，用九文为贯，文曰“干封泉宝”，其文上干，其数上九，遂通用焉。洪氏泉志曰：此钱径寸七分，重十七铢，围五寸半，文曰“乾封泉宝”。而湖南故事以为铁钱，岂当时铸铜钱二种邪？流行境内。商旅出境，无所用钱，辄易他货去，故能以本土所余之物，易天下百货，国以富饶。十国纪年云：马殷始铸铅钱，行于城中，城外即用铜钱。贾人多销铅钱持过江北，高郁请铸铁钱，围六寸，文曰“乾封泉宝”，以一当十。钱既重厚，市肆以券契借垛交易。）又湖南不事桑蚕，郁劝王令输税者以帛代钱，由是机杼大盛。

同光四年夏四月，唐主嗣源立，改元天成。王遣使修贡并贺即位，唐加王守尚书令。

天成二年春正月癸丑朔，唐主更名亶。

三月，王会唐兵伐荆南，遣都指挥使许德勋屯岳州。

夏五月丁卯，唐赐王鞍马玉带，命馈粮于行营，王不即奉诏。

是月，遣中军使史光宪入贡于唐，唐主赐王骏马十，美女二。道过江陵，南平王季兴执光宪而夺其物。

六月，王请建行台。丙申，唐封王为楚国王。唐有司言无封国王礼，请如三公用竹册。（五代会要云：先是，天成元年七月，中书门下奏湖南节度使马殷封楚国王，礼文不载国王之制，请约三公之仪，用竹册。从之。今取欧史及通鉴年月日。）

秋八月，唐册礼使、尚书右丞李序至于潭州。（序一作光序。册府元龟云：李光序为散骑常侍，后唐时与右拾遗曹琛往湖南马殷册命。先是梁中使往，如邻国礼，或称臣，呼殷为殿下，宾幕皆有丞郎给舍之目。光序等至，客司先会谒殷之礼，须遵梁朝旧事，琛谓之曰：“岂有湖南一令公称藩唐室，复欲天使称臣哉！如不受唐册命，改图，即任所为。”既见殷，但呼公而已。其余学士、舍人但呼为判官、书记。）序持节奏朝廷朱书御札，许自开国立台、承制置官属，分天子之半仗焉。

是月，王始开国，以潭州为长沙府，立宫殿，置百官，皆如天子制，而微更其名，翰林学士曰文苑学士，知制诰曰知辞制，枢密院曰左右机要司，群下称之曰殿下，令曰教。以弟竇为静江军节度使，子希振武顺军节度使，次子希声武安军节度副使，判长沙府。姚彦章为左丞相，许德勋为右丞相，李铎为司徒，崔颖为司空，拓跋恒为仆射，马珙为尚书，张瑶、张迎判机要司，潘起为吏部侍郎，何致雍户部侍郎，黄损兵部侍郎。凡管内官属皆称摄，惟朗、桂节度使先除后请命。

是岁上三代尊谥，曾祖筠曰文肃，祖正曰庄穆，父元丰曰景庄，立三庙于长沙。

天成三年春二月丁丑朔，日有食之。

三月，王如岳州，遣六军使袁诠、（欧阳史作铨，今从通鉴）。副使王环与子监军希瞻将兵击荆南，大破其军于刘郎汛，进逼江陵。南平王季兴请成，以史光宪来归。王让副使环不即取荆南，环言：“宜存江陵以为捍蔽。”王悦。

是月，大举水军击汉，围封州，为汉将苏章所败，我师遁还。

夏四月，吴右雄武军使苗璘、静江统军王彦章寇岳州，王命许德勋御于君山。丁亥，败吴兵于道人矶，卤璘及彦章以还。

五月，吴遣使求和，王归璘、彦章于吴。

六月，唐诏王讨荆南，王遣许德勋攻之，决胜副指挥使廖匡齐杀高从嗣于陈。明日，南平王季兴请成。

秋九月，荆南败我兵于白田，执我岳州刺史李廷规以献吴。

冬十二月，南平王季兴薨，吴以其子从海为荆南节度使。

天成四年春三月，王命次子希声知政事，总录内外诸军事，先行后闻。

夏四月，下教，国内铜钱百。丙午，王环败荆南兵于石首。

秋七月，王子希声矫王令杀其臣高郁。（王闻惊惋累日。）

八月，唐主敕中书门下，凡署将相敕牒，宜落吴越王鏐及王官位。（五代会要云：天成四年八月敕，朝廷每有将相恩命，准往例，诸道节度使带平章事兼侍中、中书令，并例銜于敕牒后侧书使字，今两浙节度使钱鏐是元帅、尚父，与使相名殊，承前列銜，久未改正。湖南节度使马殷，先兼中书令之时，理宜卤于相位，今守太师、尚书令，是南省官资不合列署敕尾，今后每署将相牒敕，宜落下钱鏐、马殷官位，乃永为例程。）

长兴元年冬十月，王寢疾，遣使诣唐请传位于子希声。唐疑王已歿，辛亥，命王子希声为起复武安节度使兼侍中。

十一月己巳，王薨，年七十九。（九国志云：殷以大中六年岁在壬申生，享年七十九。盖自大中壬申至长兴元年庚寅，实七十九年，为得其宝。湖湘故事运历图亦云殷长兴元年卒，独五代旧史云长兴二年卒，年七十八，似误。）遗教诸子，兄弟相继，置剑于祠堂，曰：“违吾命者戮之！”诸将议遣兵守四境，然后发丧，兵部侍郎黄损曰：“丧君有君，何备之有？宜遣使诣邻道告终称嗣，礼也。”唐主诏曰：“马殷官爵俱高，无以为赠，可谥曰武穆。”明年十二月庚申，葬于衡阳之上黄。（湖广总志云：马殷墓，在衡阳上黄水侧。）

论曰：国家之兴，岂不藉有师武臣力哉？武穆奋迹行伍之中，龙骧前驱，司马推毂，此固属有天幸，而琼之骁悍，郁之谋画，德勋以威断称，彦晖以果毅着，环则知深勇沉，恒则慷慨切直，皆一代将相才也。攀鳞附翼，共启霸图，遂尔据湘潭，跨桂岭，南抵柳、连，北震江汉，假非渤海偏处于门户，彭城密迩于比邻，偏方之大势成矣。奈何克家无人，适符众驹争栈之言，功臣冤死，国亦随衰，垂裕后昆，武穆其有惭德焉。

（清·吴任臣：《十国春秋》卷67《楚一·武穆王世家》，931~947页，北京，中华书局，1983）

刘言，庐陵人也。初事吉州刺史彭玕，从玕奔楚，事文昭王，为辰州刺史。会恭孝王与弟急国，以土木功虐用静江兵士；静江指挥使王逵等因众怨，回武陵，黜留后王子光赞，已又逐节度使王孙光惠，以言骁勇得蛮人心，欲迎立为

帅。(一云迎为副使。)言知逵等难制,曰:“不往,将攻我。”乃单骑赴之。既至,推言权武平留后。俄而潭州将徐威作乱,南唐中主命边镐经略朗州,迁马氏于金陵,因并召言。言不行,遣逵与行军司马何敬真等攻镐,大败之,言遂尽取湖南故地,惟郴、连入于南汉。奉表周朝以邀封爵,凡贡献卖茶,悉如马氏故事;又言长沙不可居,请移治所于武陵,时周广顺二年也。太祖皆许之,乃升武平军在武安军上,除言节度使、同平章事,因以武安授逵。

逵自以言已所迎立,不肯为折节,二人始稍稍不相能。逵谋曰:“言将可用者,不过何敬真、朱全琇尔,召而杀之,言可取也。”是时南汉常扰梧、桂、宜、蒙等州,逵因给言召敬真等会兵攻敌。言信之,以敬真为南面行营招讨使,全琇为先锋使,往会潭州兵,至,则陷逵计中见杀。逵乃举兵袭朗州,幽言别馆,寻杀之。(欧阳五代史楚世家云进逵乃举兵袭武陵,执言杀之,不云幽言,今从通鉴。)言镇湖南凡三年。先是朗人谓言为咬牙,一作咬乐。马氏将乱,湘中童谣曰:“马去不用鞭,咬牙过今年。”及边镐俘马氏,镐为言所遂,而言亦被害。

王逵,(周世宗实录及欧阳五代史皆作王进逵,今从通鉴。)武陵人。少为静江军卒,事恭孝王为静江指挥使。恭孝王之攻长沙也,以逵为先锋,及城陷,命逵与副使周行逢帅所步兵千人营缉长沙府舍,执役甚劳,兵皆愁怨,曰:“囚免死则役作之,我辈从大王出万死取湖南,何罪而囚役为也?且大王终日酣歌,宁知我辈作苦乎!”逵与行逢闻之,相谓曰:“众怨深矣,不早为计,祸且及。”诘旦昧爽,因拥众以长柯世斧斫关,奔归朗州。恭孝王方醉,不能省,次日始遣将唐师翥追之,及于武陵,师翥大败而还。逵遂黜留后王子光赞,而奉王孙光惠为节度使,已又废光惠送于唐,推辰州刺史刘言为帅,而自为其副。

及边镐经略朗州,且征刘言朝,逵白言曰:“武陵负江湖之险,带甲数万,安能拱手受制于人。镐抚字无方,土民不附,可一战擒也。”言乃以逵与周行逢、牙将何敬真、张仿、满公益、朱全琇、宇文琼、彭万和、潘叔嗣、张文表十人,皆署指挥使;部分发兵,攻镐于长沙。镐败走,言奉表臣周,周以言为武平节度使,亦以逵为武安节度使。未几,逵恃推立功,谓言非我不至此,势不为之下,由是渐有隙,而阴欲相矣。先是逵克潭州,以何敬真、朱全琇为静江、武安副使,二人者,言骁将也。至是,敬真与逵不协,谋同全琇作乱。周行逢谓逵曰:“刘言素不与吾辈同心,敬真、全琇又耻为公屈,盍早为之所。”逵曰:“微君言,逵敢忘乎?”乃阳言南汉见侵,檄二将帅兵御之。言性稚,不知其逛已,

即遣敬真、全琇往。及至长沙，逵谬为恭敬出郊迎，宴饮连日，多贻美伎以饵之，敬真等因淹留不进。逵乘敬真醉，使人诈为言使者，责以不暇御寇，专务荒宴，命械归西府；全琇随亡去，亦遣兵追获，皆斩首以徇。广顺三年六月，逵于是率大兵攻武陵，杀其指挥使郑玟，囚刘言于别室。八月，上表于周，诬言谋以朗州降唐，众共废之，且请移使府复治潭州。甲戌，周太祖遣通事舍人翟光裔来湖南宣抚，即授逵武平军节度使、兼中书令。无何，言被杀。

显德元年四月，逵又请使府仍徙朗州。三年，周世宗征淮南，拜逵南面行营都统，命攻唐鄂州。逵素雄豪，得志之后，不复问礼节，车服制度，拟于王者。时过岳州界，团练使潘叔嗣，逵故时同列也，待逵甚谨。逵左右多就步嗣求赂，叔嗣吝不与，左右遂谗其短，逵信而面詈之。叔嗣恚恨，语其不曰：“逵战胜而还，吾属无噍类矣。”逵入鄂州，方攻下长山，执唐将陈泽等；二月，叔嗣以兵袭朗州，逵闻之，遽轻舟归，与叔嗣战，败死。（三楚新录曰：逵领兵侵南越，留周行逢知留后事，行逢因谓所亲曰：“王公必不返，然以后事付吾者，所谓以云雨资蛟龙也。”及逵至桂阳，果为越兵所破，仅以身免，竟死于路。湖湘故事曰：王逵奉诏伐吴，有蜜蜂无万数进逵伞。盖周行逢内喜潜，与潘叔嗣、张文表等谋曰：“我睹王公妖怪入伞，他时忽落别人之手，我辈处身何地？我等若三人同心，共保马氏旧基，同取富贵，岂不是男儿哉！”周世宗实录云：显德三年二月丙寅，朗州王进逵言领大军入淮南界。庚寅，言入鄂州界，攻下长山寨。癸巳，荆南高保融言进逵自岳州领兵复归本道。又云：潘叔嗣为先锋，行及鄂州，叔嗣回戈袭击陵。进逵闻之，倍道先入武陵。叔嗣攻其城，进逵败走，为叔嗣所杀。通鉴考异云：逵命行营副使毛立为袁州营统军使，潘叔嗣、张文表为先锋。军次醴陵，县吏请具朱酒犒军，立不许，叔嗣、文表因士卒之怒，缚立送于行逢，以兵叛告逵。逵大惧，乘轻舟奔朗州，叔嗣追至朗州，杀之。丁璠马氏行事记曰：五月五日，叔嗣杀逵于朗州。诸说多不足据，今从欧阳史及十国纪年。）

逵镇湖南亦三年，与言同。初，南唐有术士言南楚气色甚佳，将有王氏起焉。时除永州刺史王温，中主疑即其人，遣使拜温征南将军，赐以印绶巾带，密于巾中实毒。使至，温拜命，着巾，俄脑裂而死。未几，逵举兵袭长沙据之，即其应也。

周行逢，朗州武陵人。少无赖，不事家人生产，常犯法，配发静江军卒。以骁勇，累迁裨校。王逵攻边镐，行逢别破益阳，杀唐兵二千余人，执其将李

建期。当是时，隶朗州刘言戏下者指挥使十人，咸以知兵名，行逢能谋，张文表善战，潘叔嗣果敢，三人多相须成功，而行逢与王逵则又情款甚昵焉。及逵为武安节度使，拜行逢集州刺史，为逵行军司马。逵与刘言有隙，行逢为昼谋策，遂袭杀言，逵据朗州，行逢据潭州。

显德元年，拜行逢武清军节度使，权知潭州军府事。潘叔嗣既杀逵，或劝其入朗州，叔嗣曰：“吾杀逵，救死而已，朗地非吾利也。”乃还岳州，遣其客将李简率朗人迎行逢为帅。行逢入城，自称武平留后，告于周。或请以潭州与叔嗣，行逢曰：“叔嗣杀主帅，罪当死，若与武安，是吾使之杀主公也。”召以为行军司马。叔嗣怒，称疾不至。行逢曰：“是又欲杀我矣。”乃阳以武安与之，召使至府受命。至则遣人执之立庭下，责之曰：“汝为小校，无大功，王逵用汝为团练使，一旦反杀主帅。吾未忍斩汝，乃敢拒吾命乎！”遂杀之。

三年二月，行逢自称武平武安留后，奉表告周。七月，世宗授行逢武平军节度使，制置武安静江等军事。宋初，加兼中书令。建隆三年十月卒，追封汝南郡王。

行逢，故农家子，起微贱，知民间疾苦，励精为治，公而无私。堦唐德求补吏，行逢曰：“汝才不堪为吏。吾今私汝，则可矣；汝居官无状，吾不敢以法贷汝。”与之农具而遣之。辟署僚属，皆取廉介之士。约束简要，吏民便之。其自奉甚薄，每曰：“马氏父子穷奢极靡，不恤百姓，今子孙乞食于人，尚足效乎？”行逢以坐事故，面有文，或请用药灭之，恐为朝廷使者嗤。行逢曰：“吾闻汉有黥布，不害为英雄，吾何耻焉！”

又性勇敢，果于杀戮，将士恃功骄慢者，一以法绳之。大将十余人，谋为乱；行逢召宴诸将，酒半，呼壮士曳下斩之，一军皆畏服。民过无大小俱死，妻勋国夫人严氏谏曰：“人情有善恶，安得一概滥杀。”行逢怒曰“此外事，妇人何知！”严氏不悦，给曰：“家田佃户，以公颇贵，不力农，请往视之。”至则营居以老，岁时衣青裙押佃户送租入城，行逢行止之，不从曰：“税，官物也，若主帅自免其家，何以率下？”一日，行逢往就之，劳曰：“吾贵矣，夫人何自苦？”严氏曰：“公思作户长时乎？民租后时，常苦鞭挞，今贵矣，奈何忘陇亩间邪？”行逢命群妾强拥升肩舆，严氏卒无留意，因曰：“公用法太严而失人心，所不欲留者，仓卒祸起，田野间易逃死尔。”行逢为之少损。

严氏，秦人，父广远仕马氏为评事，因以女适行逢。（通鉴作邓氏，三楚新录及宋史作潘氏，皆非。今从九国志。行逢死，而保权立。按通鉴纲目：显

德元年，湖南大饥，行逢开仓赈之，全活甚众。附记于此。）

保权，行逢子也。初为武平军节度副使，行逢卒，保权年十一，颇英爽有胆气，宋太祖授以起复检校太尉、朗州大都督、武平军节度使。

先是，行逢病革时，召将吏，以保权属之，曰：“吾起陇亩团兵，同时十人，皆以诛死，惟衡州张文表独存，然常怏怏不得行军司马。吾死，文表必乱，宜以杨师璠讨之。诸公善佐吾儿，无失土宇。必不得已，当举族归朝，无令陷虎口。”至是建隆三年十二月，文表果作乱，保权命师璠率众讨文表，别遣使乞师于宋。会江陵高继冲亦先以其事闻，明年春，宋太祖遣中使赵璠赍诏论文表，而保权之奏继至，乃遣山南东道节度使慕容延钊为湖南道行营南面都部署，宣徽院使李处耘为都监，率淄州刺史尹崇珂、申州刺史聂章、郢州刺史赵重进、判四方馆事武怀节、毡毯使张继勋、染院副使康延泽、内酒坊副使庐怀忠等南征，又发安、复十州兵会襄阳。

师及江陵，赵璠方至潭州，而文表已大败于平津亭，为师璠所执，齧而食之。保权牙校张从富辈以为文表已平，而宋师继进不已，惧为袭取，相与拒守。延钊乃令合门使丁德裕失路安抚，比至城下，从富辈拒而不纳，尽撤部内桥梁沉舫，伐树塞路。德裕以不奉诏，退军以须。久之，延钊奏闻，宋太祖遣中使来谕曰：“本发大军以拯尔难，妖孽既殄，是我有大造于尔，反拒王师，何也？尔无自取涂炭，重扰生民！”急命延钊进师。保权出军于澧州南，未及交锋，望风而靡，复还朗州，焚庐舍廩库，居人奔窜山谷，城郭为之一空。宋师因长驱克朗州城，获从富于西山，泉首南市。

先是，李处耘择所俘体肥者数十人，令左右啖之，黥其少健者纵归武陵。武陵人闻被擒者宋师相率齧食，俱大恐而溃。保权为大将汪端所劫，携家属亡匿江南岸，宋将田守奇获以归。（时四年三月壬寅也。）于是武怀节分兵克岳州，端犹拥众寇略，未几亦就擒，磔于市，湖南悉平。周氏镇湖南凡二世八年。是役也。宋得州十五，（欧阳史作十州，宋太祖纪作州十四，今从宋地理志。）监一，县六十六，户九万七千三百八十八。

保权至宋，上章待罪，太祖优诏释之，赐袭衣、金带、鞍勒马、茵褥，银器千两，帛二千匹，钱千贯，授千牛卫上将军，葺京城旧邸院为第，令居焉。仍命朗州增筑汝南王行逢之墓。乾德五年，保权累迁右羽林统军。太平兴国元年，知并州，赐钱三百万。雍熙二年卒，年三十四。

初行逢以淫祀为患，管内祠庙非前代有功及民者，皆拆毁之。及保权立，

酷信释氏，每岁设大会斋僧者凡四，所耗国用不费；又度僧建寺无虚日，复召群僧于府中讲唱，自为执炉焚香以听；见被缙之辈，虽三尺童子必抢地伏拜之，君子知其不克永世焉。又行逢将死时，湖南妇女悉着不缝裙，名曰“散幅”，或谓福既破散，其能久乎？已而身歿地亡，遂成符讖。

论曰：恭孝王之归唐也，湖南半壁已为唐有，而将帅失人，乖于抚驭。长沙衅起，武陵挥戈，遂使十余年间，区区数州，更易三姓，俛得俛失，兴发靡常。戡乱保国，端在人谋，宁不信哉！

（清·吴任臣：《十国春秋》卷 67《楚四·刘言王逵周行逢列传》，973~981 页，北京，中华书局，1983）

吕师周，扬州人也。豪健义侠，粗通纬候、岳书。父珂，事吴武忠王，拜黑云都指挥使；珂卒，师周代之。（路振九国志云：师周代父为黑云都指挥使。欧阳史作袁州刺史，非。）弘农王时，师周将兵屯上高，自言三世将家，惧不能免，常恣为杯酌，与酒徒聚饮，醉则起舞悲歌，慷慨泣下。弘农王闻之，疑其有异志，使人侦动静。师周益惧，谓裨将綦母章曰：“吾与楚人为敌境，吾常望其营上云气甚佳，未易败也。”师周以兵猎境上来奔，章纵其孥随之。

武穆王闻师周至，大喜曰：“吾方南图岭表，得此人足矣。”以为马步军都指挥使。率兵攻岭南，与清海节度使刘隐十余战，尽取昭、贺、梧、蒙、龚、富六州，表授师周昭州刺史。后二年，辰州蛮宋邺寇湘乡，溆州蛮潘金盛寇武冈，武穆王檄师周将衡山兵拒之。师周攀藤缘崖，引兵入飞山洞，袭金盛营，擒送武冈，随移兵击邺。邺与蛮昌师众来降。蛮洞悉平。师周后以病卒。

苑玫，蔡州人。武穆王时积功至指挥使，抚州危全讽攻洪州，气师于武穆王，王命玫会袁州刺史彭彦章出师援之，未几为淮南将米志诚所破。已而迁岳州刺史。淮南节度副使陈璋来袭岳州，遂执玫以去。玫敢勇多胆气，竟以数奇至于败。

（清·吴任臣：《十国春秋》卷 71《楚六·吕师周苑玫列传》，1002 页，北京，中华书局，1983）

刘彦瑫者，事文昭王为长直都指挥使。王薨，彦瑫与学士李宏皋等共立都尉希广。无何，王弟希崇贻书恭孝王，略言彦瑫违先王命，废长立少，义所不容。恭孝王内含怨望，而未有以发也。会自永州来奔丧，彦瑫复遣周廷海将水军往逆，令永州将士皆释甲入馆，不听恭孝王与废王相见。恭孝王归居二年，悉调